

Critica per il sboz per la refurma dal territori

■ **(cp) Tenor l'Associaziun da las Corporaziuns regionalas dal Chantun Grischun «Las Regiuns GR» na pon las finamiras da la refurma dal territori betg vegnir cuntanschidas cun la legislaziun adesiva proponida.** Betg tut las regiuns fissan bunas d'ademplier lur incumbensa da prestaziuns da servetsch tenor il concept «Fermas vischnancas – in ferm chantun» e da schliar a moda fidada ed effizienta las incumbensas d'impurtanza regionala.

Cun la refurma dal territori vegnan las corporaziuns regionalas, ils districts ed ils circuls actuals en il Grischun reunids ad 11 regiuns. Questa decisiun da princip han las votantas ed ils votants dal Gri-

schun prendi il settember 2012 cun acceptar ina midada constituziunala. Co che quest stgalim statal tranter las vischnancas ed il chantun duai funcziunar a partir dal 2015 sto ussa vegnir fixà en la legislaziun adesiva. Perquai ha la regenza grischuna tramess en consultaziun in sboz la fin da mars 2013.

Attribuir las incumbensas a las regiuns è indispensabel

Per l'Associaziun da las Corporaziuns regionalas èsi indispensabel dad attribuir las incumbensas d'impurtanza regionala a las regiuns. La formulaziun facultativa previsa en il text da consultaziun rendess impussibel a las regiuns d'ademplier las

incumbensas a moda fidada ed effizienta. Quai fiss in grond dischavantag per las vischnancas ed il chantun. La consequenza fiss ch'i stuessan vegnir creadas novas furmas da la collavuraziun surcommunal – e quai cuntrari al concept «Fermas vischnancas – in ferm chantun» che vul cuntanscher estructuras pli simples cun ina legitimaziun democratica. Era la finamira da la regenza da meglierar las cundiziuns per ademplier las incumbensas regionalas na vegniss betg cuntanschida.

Ademplir las incumbensas en regiuns funcziunalas daventa pli impurtant

La collavuraziun en regiuns funcziuna-

las daventa en il futur adina pli impurtanta. Uschia na prendan per exempel la politica regionala ed ils programs d'aglomeraziun nagin resguard sin cunfins politics. Tenor il text da consultaziun duain però incumbensas vegnir ademplitas en questa moda interregionala mo en cas excepziunals. Quai na satsifa betg a las sfidas futuras. Il sboz da la legislaziun adesiva sto vegnir cumpletà en vista a la collavuraziun interregionala.

Nagina organisaziun unitara

La regenza propona ina varianta principala unitara per tut las regiuns, la quala

prevesa che las regiuns vegnan manadas en il futur sulettamain dals presidents communal. Tenor la majoritad da las corporaziuns regionalas na resguarda questa varianta principala betg las differentas cundiziuns en las regiuns. Las regiuns ston esser ablas d'agir gia a partir dal 1. da schaner 2015. Quel mument n'è la finamira dal concept cun var 50 vischnancas anc ditg betg cuntanschida. Damai sto vegnir concedida a las regiuns – almain sco reglamentaziun transitorica – ina tscherta libertad quai che riguarda lur organisaziun. Perquai s'exprima la plipart da las corporaziuns regionalas en favur da la varianta I che sto vegnir limitada a princips.